

Mahsen en Eripit





Pwehki irair en paliwaratail kan eh kin mie lipwe ong pali ngenitail, Samatail Nanleng ketkihieng kitail kosonned akan me koasoandi pwehn kamwahuihala atail roson en paliwar oh pali ngehn. Ni eh wia kisehn Kopwurupwurdohn rongamwahu en Sises Kraiss, Koht ketin kasalehiong Soukohp Joseph Smith duwen atail kak apwalih paliwaratail kan pwe Ngehn en Kauno en kak ketiket rehtail. Kaudiahl wet kahdaniki Mahsen en Eripit. Peikiong kosonned wet wia koasoandi ehu ong pepdais ong nan Mwomwohdiso en Sises Kraiss en Souleng en Imwin Rahn Akan. Kapai laud kin kohdohng irail akan me kin kasale arail pwoson sang ni peikiong kosonned wet.

Dahkot Mahsen en Eripit?

Kauno ketin kapwarehda Mahsen en Eripit ong Soukohp Joseph Smith. Nan kaudiahl wet kitail kaweid en liksang douluhl doadoahngki sakau en wai, tipaker, oh pihl karakar, me wehwehki koahpi oh dih. Soukohp akan en mwuhr padahngki me kitail sohte konehng en doadoahngki mehkot sohte lipilipil me audepe iei mehn kasahliel kan de soahng kan me suwediong aramas oh me aramas kin sohla kakasang. Mahsen en Eripit pil padahngki me kitail en dehr nohn kang uduk oh me kitail konehng kang wahn pilawa, wahntuhke oh wahnsahpw kan.

Pwehn seweseikomwi ni pali ngehn oh paliwar, Kauno ketin kupwurki komwi en liksang:

- *Sakau en wai.*
- *Soangen tipaker koaros.*
- *Koahpi oh dih.*
- *Wini en kasahliel kan me uhwong kosonned.*
- *Soahng teikan me suwediong aramas oh me aramas kin sohla kakasang.*

Kapai kan en Mahsen en Eripit

Kapwaiada Mahsen en Eripit pahn kamwahuihala omwi roson mwahu en paliwar oh pali ngehn. Mendahte omw pahn kin kakete lelohng soumwahu oh kahpwal kan en paliwar, peikiong kosonned wet pahn seweseikomwi en ahniki paliwar oh mwahliel me ahpwete roson mwahu.

Nan Kadehde Kapw Wahnpoaron Pohl mahsanih me paliwar iei tehnpas sarawi ehu: “Ia duwe? Kumwail ese duwen amwail wialahr tehnpas en Koht, oh duwen Nge-nen Koht eh kin ketiket loalamwail? Eri, ma mehmen pahn kauwehla tehnpas en Koht wet, Koht pahn ketin kauwehla ih. Pwe tehnpas en Koht me sarawi; eri, pein kumwail me iei tehnpaso” (1 Korint 3:16–17).

Ni omw pahn kapwaiada Mahsen en Eripit, pali nge-nomw me keneinei oh mengei en kasawiada pepehm, pahn kaunopohngehr en alehdi kaweid sang Koht. Esehla en idawehn kemwekid kapehm kan oh pepehm kan me pid pali ngehn. Komw pahn kaweidki soahng kan me keper oh pahn kaweid sang Ngehn Sarawi. Omw eripit oh loalokong pahn laudla. Komw pahn ah-niki laudlahn meleilei en madamadau, laudlahn kehlail en kaunda pein komwi, oh madamadau en koapwoaroa-pwoar ong me pid mour wet oh dahme kohkohdo.





Mahsen en Eripit

Kaudiahl wet, me Soukohp Joseph Smith alehdi nan 1833, iei kaweid sang Samatail Nanleng ong Sapwellime serihkan rahn pwukat. Me sansal pah iei kisehn kaudiahl wet, me kak dierek nan Doctrine and Covenants, pali 89:

“E wia Mahsen en Eripit ong kamwahupen Mwomwohdiso oh souleng kan en Saion. . .

“E wia tepin padahk me iangahki inou, me koasoandi en pahrekohng kak apwalih koahiek en me luwet oh me keieun luwet rehn souleng kan. . . .

“Kauno mahsanihong souleng kan me, pwehki suwed akan oh pilahn suwed akan me mie ansou wet oh me pahn miehda nan mohngiong en aramas me ahniki koasoandi suwed akan nan imwin rahn akan, E . . . ketin doareikitail sang ni ketkihong kitail mahsen en eripit wet sang ni kaudiahl—

“E sohte mwahu ong kitail en nim wain de sakau en wai. . . .

“Tipaker pil sohte mwahu ong paliwar de kapehd oh sohte mwahu ong aramas. . . .

“Pihl karakar [dih oh koahpi] sohte mwahu ong paliwar de kapehd.

“. . .Koht ketin kapikada tuhke mwahu koaros ong roson mwahu oh paliwar en aramas, oh pwe ren doadoahngki. . . .

“Koht ketin koasoanehdi me uduk en mahn oh menpihr en doadoahk ong aramas ni kalahngan; ahpw ni kasohtik. . . .

“Wahn pilawa mwahu ong kenen aramas iangahki wahn-tuhke dou kan, me mie wah sohte lipilipil ma nan pwehl de pohn pwehl. . . .

“Oh souleng koaros me tamataman en kolokol oh kapwa-iada mahsen pwukat pahn ahniki roson nan kapehdarail oh kehl nan tihrail kan;

“Oh pahn diarada eripit oh loalokong kesempwal me laud, lella me kesempwal rir kan;

“Oh re pahn tang oh sohte pwangada, oh pahn alu oh sohte lipwongmas.

“Oh Kauno ketkihda inou wet, me tohnleng en kamwo-mwala pahn daulih irail, duwehte serihkan en Israel, oh sohte pahn kemeiraila. Amen” (Tehk Doctrine and Covenants 89:1, 3–5, 8–10, 12, 16, 18–21).





Kesehla Soahng Kan Me Suwediong Aramas

Ma komw kin doadoahngki tipaker, sakau en wai, koahpi, dih, mehn kasahliel kan me uhweng kosonned, de soahng teikan me suwediong aramas oh me aramas kin sohla kakasang, uhdi met. Komw pahn kapaikihda paliwar oh pali ngehn me ahpwete roson mwahu. Ekei aramas kakairadahrtiahk kan me re ahnlahr wiewia de kin elehieng en apwal irail en liksang. Ma komw apwaliki kesehla soahng pwukat me kin kahrehieng aramas en sohla kakasang, peki rehn Koht ni kapakap en seweseikomwi en weliankihdi madamadau suwed kan, kemwekid kan, oh kasongosong kan, soahng kan me mie lipwe me mwahu oh pahn kakehlailih komwi. Ni omw pahn audehkihda omwi mour me mwahu oh me pahn kakehlailih komwi, e pahn tikitikila dewen me keper oh suwed. Iren kaweid kan me sansal pah pahn seweseikomwi:

- Koasoanehdi en kesehla. Kapakap oh kaisihsol ni koapwoaroapwoar me Kauno pahn ketin seweseikomwi en powehdi omw kahpwal en sohla kakasang me suwedo.
- Onopiki pwuhk sarawi kan. Wadlikiala ire kan oh kin kalapw nda. Re pahn kihong komwi manaman me pid pali ngehn.
- Pekihda eh u kapai en priesthood pwehn seweseikomwi en powehdi kasongosong.

Nantihlahte wie songosong! Ni omw pahn doadoahngki Tomwo nan omwi mour, Kauno pahn ketin seweseikomwi, mendahte ma omwi keirda mwomwen pwand.

- Kesehla soahng kan me suwediong aramas, oh dehr pil alehda.
- Ntingihdi ansou kan, wasa kan, oh irair kan me pahn kasongosong komwi en kawehla Mahsen en Eripit. Koasoaieng omw pahpa nohno, omw pwoud, misineri kan, oh kompoakapahmw likilik kan duwen omw pahn kak soikala wasahkan de irair kan me komw ntingihdi. Ni karasepe, kilangada kemweit kan oh mwadong kan me kapw me sohte pahn kin kihieg komwi kasongosong. Rong ngilen keseng mwahu, papah mehteikan, wadek pwuhk kan me mwahu, de eksersais ni ansou me komw pahn alehdi kasongosong.
- Towehda kemwekid kan en Mwomwohdiso. Komw pahn karanihla Kauno oh ahniki laudlahn kehlail en powehdi ineng kan ong me suwediong aramas.
- Towehda pwihn en utuht kan me konehng de alehdi sawas sang me semen.
- Dehr manokehla me Kauno pahn ketin seweseikomwi ni omw pahn likih Ih. Kesehla soahng pwukat kak en apwal mehlel, oh ekei aramas mwein pahn kakete pwuralahng tiahk en mahs kan pak kei mwohn arail pahn kak kesehla mehlel. Nantihlahte wie songosong, oh dehr sohla koapwoaroapwoar.

Sang ni karakarak oh mehlel oh sang ni peki sawas sang Koht oh mehteikan, komw kak powehdi omwi kahpwal kan en sohla kakasang me suwed kan sang ni Tomw en Sises Kraiss.

Ni omw pahn momourki Mahsen en Eripit, kapai kan me Kauno ketin inoukihong kitail pahn kohieg komwi.



ONOP KAPATAPAT

Peidek kan oh iren pwuhk sarawi kan me sansal pah pahn seweseikomwi ahpwete esehla duwen tepin padahk kan nan kisin pwuhk wet. Iren sawas kan ni kapin teh oh kaweid ong iren pwuhk sarawi tohrohr pahn kapehsehkinkomwi ire kapatapat kan oh elen sawas kan me pid tepin padahk pwukat.

Ia kahrepen ei anahne kanaiehng dahme I kihie ng nan paliwereie?

Lepin Padahk Audapan Kan 20:1 (Pwuhk Sarawi, Kadehde Mering)

1 Korint 3:16–17 (Pwuhk Sarawi, Kadehde Kapw)

1 Korint 6:19–20 (Pwuhk Sarawi, Kadehde Kapw)

Doctrine and Covenants 89 (Misineri kan de emen tohn Mwomwohdiso kak seweseikomwi en alehdi ehu koapi en pwuhk en Doctrine and Covenants. Komw pil kak tehkada www.mormon.org pwehn diarada nan internet.)

“Mahsen en Eripit,” *True to the Faith* (Misineri kan de emen tohn Mwomwohdiso kak seweseikomwi en alehdi ehu koapi en pwuhk wet. Komw pil kak diarada nan internet ni www.mormon.org.)

Soahngen kapai dah en pali ngehn oh paliwar me kak kohdo sang ni peikiong sapwellimen Koht kosonned akan ong ahi roson mwahu?

Daniel 1:3–20 (Pwuhk Sarawi, Kadehde Mering)

Ia duwen Kauno eh pahn ketin kakehlailihie ni ansou me I kin kasongosong?

Mosiah 5:2 (Pwuken Mormon, teh 85)

Mosiah 7:33 (Pwuken Mormon ni lokaiahn wai, teh 162)

Alma 13:27–29 (Pwuken Mormon, ni lokaiahn wai 243)

Ether 12:27 (Pwuken Mormon ni lokaiahn wai, teh 510)

Dahme I Konehng Wia?



- Doulahte wadewadek Pwuken Mormon.
Ire kan me katweid ong wadawad: _____

- Momourki Mahsen en Eripit. Kapakapki sawas en kapwaiada kosonned wet. Koasoanehdi duwen omw pahpahn kamwahuwihala omwi roson en paliwar oh pali ngehn sang ni liksang mwenge de wini me suwediong aramas oh sang ni nsenohki mwenge pahrek oh tiahk teikan ong roson mwahu.
- Iang sarawi Rahn Sarawi wet.
- Doulahte kaunop ong pepdais.
Rahn en pepdais: _____
- Tehkada www.mormon.org pwehn ahpwete esehla duwen Mwomwohdiso en Sises Kraiss en Souleung en Imwin Rahn Akan.
- Doulahte tuhwong misineri kan pwehn ahpwete esehla duwen kosonned akan en Koht ahr kak kapaiada omwi mour.

Ansoun pwurehng tuhpene: _____

Eden misineri kan oh nempehn delepwohn:

MWOMWOHDISO EN
SISES KRAIS
EN SOULEUNG EN IMWIN
RAHN AKAN

www.mormon.org

